

Galetiya Tovetumagana Yadi Leta Paulo Givetokilumina

Kivemala

Kaliva-dina badi Yeisu imadu vetumaganena ani meIsileli gagana, badi tova tuwai-moena Yaubada giveledi yana veimeya-dina Mosese wagaine. Ada tovetumagana-dina nagona mulidiya, badi keke meIsileli kaduwe ivetumagana Yeisu wagaine, aku keke ida muliye Mosese yana veimeya. Aku meIsileli tovetumagana tufodi ani ivetumagana vaita Mosese yana veimeya ani kadu badi keke meIsileli ida muliyedi, e ada badi inunudadanana aku badi keke meIsileli tovetumagana ilulumodovedi ke Mosese yana veimeya ina muliyedi. Aku Paulo ani keke gida nuwanuwa anafaiweya, ada yana laumamala wagaine givonavona meGaletiya wagaidiya, givona, “Wai seya-moena wagaine Yaubada ginase mi yegayegamiyavo Tauna matane, taine yami vetumagana gagana Yeisu wagaine.”

E aku aimo Paulo gimiyamiya atuwada aku gikaiyanogala vaita tovewala fwayafwaya iyegemona Galetiya anafafaliya ada igaluvaluva tovetumagana ina nuvuyoyedi. Kaduwe badi tovewala-dina ivonavona vaita Paulo keke afositolo vele moena e ada kaliva keke bonana ida nogali. E ada leta taidei giimilina wagaidiya ke tovetumagana gina kivetunudi,

ada giluwaregedi ke taide vewala fwayafwaya-nai ani ina segena. Ada leta anaebalaubyabu wagaine Paulo givona kivetoyogidi ke yadi dewa ina itaveyabidi.

Vona vesiule. (1:1-5)

Valeya iwakana seya-moena, keke tamo anavelu. (1:6-10)

Paulo anavedo Yaubada wagaine. (1:11 - 2:10)

Paulo Pita yana koyona faina givona tunutunugina wagaine. (2:11-21)

Mosese yana veimeya anamuliya o kai Keliso anavetumagana? (3:1 - 4:31)

Keliso gietoyavuda Mosese yana veimeya yana iyogona wagaine. (5:1-26)

Imi seyana seyana wana velemalesa amivita wagaidiya. (6:1-10)

Paulo yana matawa anaebalaubyabu ke veta-lakafoi. (6:11-18)

¹ Iya Paulo, Yeisu Keliso yana afositolo seyana. Keke kaliva-mowa ida venuwadadaneku ke gada veafositolo, keke-mowa. Aku Yeisu Keliso Tauna ke Yaubada Tamada Banae Yeisu gisiveyawana alikeya ani adiselu gaga ivenuwadadaneku ke gaveafositolo.

² Imi Yaubada yana yoo wamiyamiya yana ekalesiya seyana seyana Galetiya anafafali wagaine ani Iyayeku ada tubuiyadeyavo idedeku nodi yama vesiule wagaimiya.

³ Yaubada Tamada ada yada Kauveya Yeisu Keliso yadi nuwadogeya ina lemelememi, ada kaduwe aseasemi ina kikiveniwalovidi.

⁴ Keliso Tauna givela-kavovoyena yada koyona faina, e ada gina etoyavuda malina tova-dina

adidewa koyodi wagaidiya.† Taidei, yada Yaubada Banae Tamada yana nuwanuwa gimuliyena anafaiweya.

⁵ E ada Yaubada Banae anayegana kana kikilakaina tova moyaina keke anaebal-auyabu. Ika anafaiweya.

Valeya iwakana seya-moena, keke tamo anavelu.

⁶ Iya gatataweyana yami dewa wagaine. Faina Yaubada givenuwadadanemi Keliso yana nuwadoga wagaine, aku bademowa wanuyabuyabuna ada wanau mali vewala wagaine.

⁷ Ada velemoena taidei keke valeya iwakana. Keke-mowa. Aku kaliva tufodi ani nuwami ikikivevoganina ke igaluvaluva Keliso anavaleya iwakana ina vetoviviyena.†

⁸ Aku keke bonadi wana nogalidi. Wana itana, kai gaito gina ifuifufu wagaimiya Yeisu faine aku yana ifufu-nai gina vetoviviyena valeya iwakana tuwaina avelemi, aga analauboda gina alika-vagata eli wagaine. Ime idedeku ada gabama anaaneloseyavo kaduwe. Kai ime anafaiweya adadewa, aga amalauboda ada alika-vagata eli wagaine.

⁹ Bademowa avona anafaiweya ada kaduwe ganavona-vagila, imiyavo bademowa valeya iwakana wavaina, e aku kai gaito seyana mali valeya tulina gilulumamalena wagaimiya, aga banae analauboda gina alika-vagata eli wagaine.

† 1:4 Tai 2:14 † 1:7 Gug 15:1,24

10 Gavaiyamu, taidei gavonavona, e ani ananogala vaita gagaluvaluva ke kaliva Iya ina awaveiwakaneku? Keke. Iya nuwanuwaku ani Yaubada yana awaveiwakana. O kai gagaluvaluva kaliva gakikivemwamwalidi?† Kai aimo gagaluvaluva kaliva nuwadi gana vaina ke nuwanuwadi Iyayeku, aga Iya keke Keliso yana togugai.

Paulo anavedo Yaubada wagaine.

11 Tubuiyakuweyavo, nuwanuwaku imi wana alamanena, valeya iwakana galumamalena ani keke kaliva-mowa yadi nuwanuwa wagaine gidaela.†

12 Faina Iya keke gadavai kaliva-mowa wagaiddiya o kai seyana gaito gida vewala wagaikuya, aku Yeisu Keliso Banae giivemogatalina wagaikuya.

13 Faina bademowa wanogalina tuwaina yawaiku anaifuifufu, tova-nai ime meIsileli yama vetumagana anagiduwa gamuliyedi. Ada Yaubada yana kalivayavo gakiveuloulolonidi ke gagaluvaluva evona yana ekalesiya gana luyavulena.†

14 Ime meIsileli yama vetumagana anagiduwa wagaine, gaawaageku velemonoena ada wai ganago-moena gugai wagaine ayo muliya tubuiyakuweyavo, ada tamameyavo nagona adigiduwa faina ganuwanuwa toyogi-moena.†

† 1:10 1Tes 2:4 † 1:11 Mad 16:17 † 1:13 Gug 8:3, 22:4-5, 26:9-11

† 1:14 Gug 22:3

15 Aku yaku tubuga wagaine-deya† Yaubada givenuwadadane-vagaiku. Yana nuwadoga wagaine givenuwadadaneku yana togugai,† ada wa yana vemwamwala

16 Natuna giivemogatalina wagaikuya† e ada Banae gada lumamalena badi keke meIsileli wagaiddiya. Tova-nai wagaine, keke seyana gaito gadavone ke gida voneku gavana gana gugai Banae faine,

17 o kai gadalaka Yelusalema gada itadi badi imaduveafositolo biyavo-dina. Aku ganau tunutunugina Alebiya anafafali wagaine, e ada muliya gayewaku Damasiko.

18 Malamala toiye muline, galaka Yelusalema ke Pita gana madubodana, ada nodi amiya yadayada fiftini.†

19 Wadedeku keke tamo gava afositolo gadaita aku Iyemesa anakaibe, banae yada Kauveya taina.†

20 Yaubada gialamanena gavana gave-tokilumina ani vona velemonoena, keke gada vefwayafwaya.

21 Ada muliya ganau Siliya ke Silisiya.

22 Tova-nai wagaine Keliso anatovetumagana adiyoo tulina tulina Yudiya anafafali wagaine ani keke ida alamaneku.

23 Tainei-mowa ikaiyanogala taidei anafaiweya, “Kaliva-nai tuwaina ide gikiveuloulolonida, ani malinai gilulumamalena vetumagana-nai tuwaina gibalalava gida luveyawaliyena.”

† 1:15 Ais 49:1,5, Iyel 1:5, Luk 1:15 † 1:15 Gug 9:3-6 † 1:16 Gug 9:3-6 † 1:18 Gug 9:26-30 † 1:19 Mad 13:55

24 E ada wagaikuya-deya Yaubada idavana.

2

Afositoloyavo Yelusalema wagaine iawavei-wakanena Paulo yana laumamala.

¹ Malamala fotini muline galaka-vagila Yelusalema wagaine Banabasi nodi, ada kaduwe Taito.

² Ganau faina Yaubada giivemogatalina wagaikuya gadanau. E ada ganau badi gavega tonagonayavo Yelusalema wagaine nodi amaloi avagauta, ada gaawatalatalainedi valeya iwakana ifuifufuna galumamalena badi keke meIsileli wagaidiya. Badi tonagona gaga gaifuifufuyedi faina nuwanuwaku gavaiyamu gavevewala ani ina alamanena. Faina ganuwamatauta aenanai taidei yaku vewala-nai ina dibusoyogena, e ada yaku gugai tuwaina-deya gielai malinai ani ginaavai-kavovo-ku guwana keke.

³ Taito akutokwayabu, ani banae kwana Giliki aku auwe keke ida luyali ke vovona bubuna bwatana ida tomogoloi.†

⁴ Aku kaliva tufodi nuwanuwadi Taito tomogolota gina vaina, aku biyavo-dina tovetumagana fwayafwaya ani amayoo wagaine iluku ke ikavuya inaita venuvenuwadadanema gavaiyamu amaetoyavuga anuwagana Yeisu Keliso wagaine. Faina biyavo-dina nuwanuwadi

† 2:3 Luk 1:59 ke anaailabama adiebakivemala

ina yogoma Mosese yana veimeya ananuwanuwa wagaine, vaita togugai yogoyogodi anafaiweya.**

⁵ Aku keke maita seyana ada awaega yadi nuwanuwa wagaine, e ada valeya iwakana anatunutunugina velemonoena aimo gina miyamiya imi keke meIsileli wagaimiya.†

⁶ Ada Iya gaifufuyedi valeya-nai iwakana galulumamalena kaliva wagaidiya faine, ada badi gavega adiyegana lakaidi au iawaegau wagaine. Tova-nai inogalina, keke idavona venuwadadane, ada keke gavavona ida vetutamwata yaku laumamala wagaine. Aku kai tamo kaliva wa anayegana o kai keke, wada keke gaitoma lakaina wagaikuya. Yaubada matane kaliva matatabuna ani lelelelya.†

⁷ Badi tonagonayavo keke mali veimeya ida veleku, aku iinanana vaita Pita veimeya Yaubada givelena ke ginanau valeya iwakana gina lumamalena badi meIsileli** wagaidiya anafaiweya, Iya kaduwe veimeya giveleku ke givetumaganeku valeya iwakana gana lumamalena badi keke meIsileli wagaidiya,

**

2:4 Tova-nai wagaine kaliva tufodi aimo inuwanuwa vaita Mosese yana veimeya anamuliya wagaine adikibababala ina nuwagana. Aku Yeisu yana alika wagaine kaliva adikibababala ananuwaga ani Yeisu anavetumagana wagaine.

Taidei adaiyavuga. † **2:5** Gug 15:1,24 † **2:6** Gug 10:34 ** **2:7** Badi meIsileli ani Yaubada tomogolota anagiduwa givedi e ada tuwaina-deya imulimuliyena, aku badi keke meIsileli ani keke ida muliye. Aku giduwa-nai ani gaitoma lakaina meIsileli wagaidiya, ada taide faina Paulo yana vetokilumina vona Giliki wagaine ani meIsileli givewagadi 'badi vovo anatomogolota ivaina' aku badi keke meIsileli givewagadi 'badi aditomogolota keke'.

badi tomogolota anagiduwa keke ida muliye.

⁸ Faina Yaubada Banae Pita gitoyogivelena ke giveafositolo meIsileli wagaidiya, ani kaduwe Iya gitoyogiveleku ke gaveafositolo badi keke meIsileli wagaidiya.

⁹ Iyemesa, Pita, ada Iyoni, badi ivetonagona kaliva matadiya, ani iitainana Yaubada yana nuwadogeya faisewa taidei lakaina giveleku, e ada Banabasi ke Iyayeku ivenimasibutuyema, ada tayuwe giveiyaiyaya vaita ime aveyavo seyana gugai taidei wagaine. Ada iawae-gau Banabasi ada Iyayeku ana faisewa badi keke meIsileli adimwatuguya aku badiyavo ani meIsileli adimwatuguya.

¹⁰ Aku yadi veola seya-moena ani fanifanidiyavo ada nuwaudududi badi yadi yoo wagaine, gaitoma-nai nuwanuwaku lakaina gana faisewana.[†]

Paulo Pita yana koyona faina givona tunutunugina wagaine.

¹¹ Aku tova-nai Pita gielai Anitiyoki melala wagaine ani gaitana yana gugai seyana ani koyona velemoena, e ada bana wagaine gavona tunutunugina yoo matadiya.

¹² Faina tova nagona wagaidiya ani tova moyaina Pita gikanikani tovetumagana badi keke meIsileli nodi. Aku muliya kaliva tufodi ielai Iyemesa wagaine Yelusalema-deya, ani giitadi e ada badi keke meIsileli gimiyasegedi ada

[†] 2:10 Gug 11:29-30

keke nodi ida kanikani. Faina meIsileli badi inuwanuwa toyogina Mosese yana veimeya wagaine ke tomogolota anaveimeya faina ani yoodina gimatausedi.

¹³ Ada kaduwe meIsileli tovetumagana Anitiyoki wagaine ani Pita yana meyalagalaga imuliyena. Ada keke badiyavo gaga aku kadu Banabasi nodi yadi meyalagalaga wagaine nuwadi isebalena.

Yada vetumagana wagaine Yaubada giseda yegayegadeyavo Tauna matane.

¹⁴ Aku tova-nai gaitana yadi dewa keke anafaiweya valeya iwakana ananuwanuwa velemono, e ada Pita gavonena tovetumagana moyaidi matadiya, gavonaga, “Oyeni kwana Isileli. Aku ya dewa anafaiweya badi keke meIsileli yadi dewa, ada keke meIsileli anafaiweya. E aku gavaiyamu-yo badi keke meIsileli ululuyalidi e ada meIsileli adagiduwa ina muliye? Taidei dewa keke iwakana wagaikuya.”

¹⁵ Ideyavo katubuga meIsileli. Ide keke badi keke meIsileli, badi kavewagadi ‘tokoyona’.**

¹⁶ E aku kaalamanena kai kaliva Mosese yana veimeya gina matawalewaleyena vaita taidei wagaine Yaubada ginasena yegayegana Tauna matane, aga taidei gina galuvaluva-wayoga. Faina Yeisu Keliso wagaine ani taidei wai-nai gaga

** **2:15** MeIsileli ani Yaubada giveledi yana veimeya Mosese wagaine, ada taidei faina badiyavo inuwanuwa vaita taudiyavo yegayegadiyavo. Aku badi keke meIsileli ani Mosese yana veimeya keke wagaidiya gida miyami e ada keke ida mulimuliye. Taidei faina meIsileli inuwenuwedi vaita badi tokoyona.

wagaina Yaubada kaliva ginasena yegayegana Tauna matane. Taidei faina ide meIsileli kaduwe Yeisu Keliso wagaine kavetumagana e ada yada yegayegana kanuwagana yada vetumagana Banae wagaine. Keke vaita Mosese yana veimeya anamatawalewale wagaine aimo kada tunutunuvala ke yada yegayegana kanavai. Faina veimeya-nai anamatawalewale ani keke anafata bana wagaine ada seyana gaito Yaubada ginasena yegayegana Tauna matane.[†]

¹⁷ Aku kai yada yegayegana kalelelena Keliso wagaine aku wadedeku-deya kana itanuwagada vaita ide tokoyona, aga gavaiyamu, evona Keliso Banae ani koyona anatovegugai e ada ginagoyeda ke kakoyokoyona? Au keke-mowa.

¹⁸ Ada kai Iya kaduwe gada vetumagana vaita Mosese yana veimeya gaidibumwaigena faina, Yaubada ginaseku yegayegaku Banae matane, aga Iya anafaiweya kaliva bana manuwa giyawelina aku gaitoma-dina manuwa wagaine iyogona ani givaidi ada wagaidiya manuwa kaduwe giyogona. Tova maufona ani gina malina vaita veimeya-dina seyadi Yaubada Mosese givelena ani Iya aditoiyawela.

¹⁹ Mosese yana veimeya-nai anaidibumwaiga ani Iya keke akufaiweya, e aku akuetoyavuga ganuwagana veimeya-nai wagaine e ada akufaiweya yawaiku gana miyamiyanena Yaubada faine.

²⁰ Tova-nai Keliso ikivebolagalagana, Iya yaku dewa koyona nodi ikivebolagalagana. Ada yawai-nai wagaikuya malinai ani Keliso yawaina, keke tauku yawaiku. Yawai-nai vovoku wagaine

[†] 2:16 Lom 3:20-28, 11:6

gamiyamiyanena ani Yaubada Natuna anavetumagana wagaine, Banae ginuwakabubuyeku ada yawaina giawaegena faikuya.†

²¹ Yaubada yana nuwadogeya gilemeku lakai-moena, ada taidei nuwadoga-nai keke gada vegaitoma-kavokavovoye. Faina kai anafata kaliva yana yegayegana ginuwagana veimeya anaitaveyabina wagaine, aga Keliso gialikakavovo faideya.

3

Mosese yana veimeya anamuliya o kai Keliso anavetumagana?

¹ Imi meGaletiya kwavakwavamiyavo! Gaito yami nuwanuwa gikivekoyo ke gikivebalami yana nuwanuwa koyona wagaine? Tuwaina akivemalina wagaimiya Yeisu Keliso yana alika kelose wagaine, anafaiweya vaita matamiya tau-miyavo wadaita.

² Nuwanuwaku gaitoma seya-moena faina gana toolidana wagaimiya. Aluwaluwa Tabuna Banae gimiyamiya nafomiya ani gavawai wagaine wavai? Veimeya anamatawalewale wagaine, o kai valeya iwakana wanogalina ada wavetumaganena faina?

³ Wavekwavakwava velemono! Nago-moena wavevuvu yawai evaguna Aluwaluwa Tabuna yana toyogina wagaine, ani gavaiyamu-yo wagaluvaluwa wana luyabu taumiyavo yami nuwanuwa gagana wagaine?

† 2:20 Lom 6:6, 7:6, Iyo 13:1, Gal 1:4

⁴ Gavaiyamu, gaitoma moyaidi walutovoni-kavovodi o kai keke? Keke.

⁵ Yaubada givemi Aluwaluwana ke gugai ebameyasidobodobo gigugaiyedi amimwatuguya, gavana vuvuna? Yami matawalewale Mosese yana veimeya wagaine, o kai valeya iwakana wanogalina ada wavetumaganena faina? Au yami vetumagana faina.

⁶ Wanaduna Ebelaamo. Buki Tabu givona,

“Banae Yaubada givetumaganena ada yana vetumagana faina, Yaubada giawaveiwakana
nena
ke givona banae faine, givona, ‘Banae yegayegana
Iya matakuya.’ ” †

⁷ Taidei faina nuwami gina malina vaita badi gavega ivetumagana ani biyavo-dina velemono Ebelaamo natunavo. **

⁸ Buki Tabu wagaine gimaduvonayena ani yadi vetumagana faina, Yaubada badi keke meIsileli ginasedi yegayegadiyavo Banae matane. E ada Valeya Iwakana taidei ani Ebelaamo wagaine gimaduawatalatalainena, givonaga,

“Oye wagainiya babi anakaliva adiyoo moyaidi ani

† **3:6** Eba 15:6, Lom 4:3,9,22, Iyem 2:23 ** **3:7** Ebelaamo ani badi meIsileli tamadi nagona. Aku ide taudeyavo kaawaegeda Yeisu wagaine ani yada vetumagana wagaine ide kaduwe Ebelaamo yana tubudelideli, e ada gikivelaubodana ke banae kaduwe ide tamada nagona. (Lom 4:16)

ina vemwamwala, faina Yaubada yana
nuwakabubu
ke yana leme ina nuwagana.” †

⁹ Ebelaamo ani tovetumagana velemono, ada
Yaubada wa yana nuwadoga gilemelemena.
Ada kadu anafaiweya, badi gavega Yaubada
ivetumaganena ani Banae wa yana nuwadoga
gilemelemedi.†

¹⁰ Faina gavega moyaidi inuwaveyalaina vaita
Mosese yana veimeya gaga ina matawalewaleyna
ke yadi yegayegana ina nuwagana Yaubada
matane, ani badiyavo alatabutabu dibune
imiyamiya. Faina Buki Tabu wagaine givona,

“Gavega keke ina gugugaiye gavana
matatabuna
Veimeya anabuki wagaine giveimeya,
aga alatabutabu dibune imiyamiya.” †

¹¹ E ada gimalina ani veimeya anamuliya
wagaine Yaubada keke seyana gaito
gida awaveiwakane ke gidasei yegayegana Banae
matane. Faina Buki Tabu givona,

“Badi gavega yegayegadiyavo Yaubada
matane
ani yadi vetumagana wagaine ina miyamiya.”
†

¹² Aku veimeya anamatawalewale anawai ani

† 3:8 Eba 12:3, 18:18, 22:18, Gug 3:25 † 3:9 Lom 4:16 † 3:10
2Vei 27:26 † 3:11 Lom 1:17, Gal 2:16, Ibel 10:38

tuli-moena Yaubada anavetumagana wagaine.
Faina veimeya anamatawalewale anawai faine
Buki Tabu wagaine givona,

“Kai badi nuwanuwadi yawai ina nuwagana
veimeya anamuliya wagaine,
aga veimeya matatabu-moena
ida matawalewaleyena.”†

13 Keliso gitutuveobuda veimeya yana
alatabutabu wagaine-deya, faina ide faideya
alatabutabu ginuwagana. Faina Buki Tabu
givona,

“Gavakaliva vovona kai ina luvekwaiyoyona ai
wagaine,
banae alatabutabu dibune gimiyamiya.”†

14 Taidei anafaiweya Yeisu Keliso keloseya
gitutuveobuda e ada Banae wagaine
awanuwakabubu-nai Yaubada givelena
Ebelaamo ani gida yegemona badi keke meIsileli
wagaidiya. E ada ide moyaida yada vetumagana
wagaine kana nuwagana Aluwaluwa Tabuna
Yaubada gimadu vonadabadabayena.

*Mosese yana veimeya ada Yaubada yana von-
adabadaba.*

15 Tubuiyakuweyavo, nuwanuwaku
gana vonalufefosau kaliva yada dewa seyana
wagaine. Kai kaliva adiselu ina awaegau gaitoma
seyana faina ke ina vonadabadaba faine, ada

† 3:12 Lom 10:5 † 3:13 2Vei 21:22-23, 2Kol 5:21

fefe wagaine ina vetokilumina e ada gina toyoga, aga aimo keke meyameyaganina seyana gaito nuwanuwa-nai gina vaiyavule o kai nuwanuwa evaguna gina vetutamwata. Tainei kaliva-mowa yana vonadabadaba.

¹⁶ Aku kana nuwanuwayena vonadabadabadina Yaubada giveledi Ebelaamo ke yana tubudelideli wagaine. Buki Tabu wagaine Yaubada keke gidavona 'yana tubudelideliyavo faidiya' vaita moyaidi, aku givona 'yana tubudelideli' kaliva seyana faine, kaliva-nai Banae Keliso.**

¹⁷ Yaku vona anaalamana taidei anafaiweya. Nago-moena Yaubada yana veyavo anawai gibubuna Ebelaamo wagaine ada givonadabadaba-vagata wagaine, aku malamala fowa analedi teti (430) muline, Mosese yana veimeya giyegemona. Keke anafata Mosese yana veimeya muliya gielai ani Yaubada yana veyavo anawai gina luyaweli kai yana vonadabadaba gina vaiyavule.

¹⁸ Faina kai veimeya anamatawalewale wagaine Yaubada adavutuga gina veleda, aga keke gidaela Yaubada yana vonadabadaba wagaine. Tainei keke anafaiweya. Aku anavelemoena ani Yaubada yana nuwadogeya anavutuga givelena Ebelaamo yana vonadabadaba wagaine.†

¹⁹ Aku gavaiyamu-yo nagona Yaubada yana vonadabadaba giveda aku muliya veimeya

** **3:16** MeIsileli yadi vona wagaine keke idavona 'tubudelideli' vaita moyaidi. Ivona, 'guwa', ada taidei wagaine Yaubada giifufu kaliva seyana faine, ani Keliso. (Eba 12:7, 13:15, 24:7) † **3:18** Lom 4:13-14, 11:6, Ibel 6:13-14

giveleda? Yaubada veimeya giveleda e ada kaliva ina inanana vaita veimeya-nai iyaweyawelina, faina yadi nuwanuwa koyodi.[†] Ada veimeya-nai gimiya-deya Ebelaamo yana tubudelideli velemono gielai, Banae Yaubada givonadabadabayena. Ada kaduwe, veimeya giveledi anelose wagaidiya ada tomidigolota-nai Mosese badi ivelena, ada banae giveledi kaliva.

²⁰ Tomidigolota gilubodana yoo iluwei faidiya, aku tova-nai Yaubada yana vonadabadaba give-lena Ebelaamo, Yaubada anakaibe-mowa gigu-gaiyena.

²¹ Seyana gaito kai gina tolidadana, “Gavaiyamu, kai Yaubada yana veimeya vaita givenibainena Yaubada yana vonadabadaba o keke?” Au keke, keke-mowa! Faina kai veimeya gida veleda ani anafata yawaida evaguna gina veleda, aga yegayegana Yaubada matane kada nuwagana veimeya-nai anamatawalewale wagaine.[†]

²² Aku ida keke anafaiweya. Faina Yaubada yana vona givona matatabu-moeda ani anafaiweya kaliva badi imiyamiya koyona anadeli wagaine. Faina koyona gikikiveyabida. Tainei faine gisebodada, keke tamo gavawai kanavai.[†] Aku tainei wagaine ide kana vetumagana Yeisu Keliso wagaine, ada yada vetumagana wagaine gavana Yaubada tuwaina givonadabadabayena ani guwana kana vaina.

²³ Aku muliya-yo vetumagana taidei gielai, ideyavo ani veimeya giyogoda ke kavetogugai

[†] 3:19 Lom 5:20 [†] 3:21 Lom 8:2-4 [†] 3:22 Lom 3:9-20

wagaina analaba Yaubada vetumagana anawai gikiveyegemonina.

²⁴ E, ada Mosese yana veimeya ani anafaiweya adatoitaveyabina. Ginagoyeda analaba Keliso giobuelai ke yada vetumagana wagaine Yaubada gidaseda yegayegadeyavo Tauna matane.

²⁵ Aku malinai ani vetumagana anawai bade-mowa giyegemona, ada ideyavo tova malinai keke-mowa aimo kada miyami veimeya yana itaveyabina dibune.

²⁶ Faina moyaimi ani imi Yaubada natunavo yami vetumagana Keliso Yeisu wagaine.†

²⁷ Faina imiyavo gavega wababitaiso Keliso anayeganeya ani bademowa Banae nodi waveseyana ada Keliso wavaina waosena anafaiweya nuya.†

²⁸ Ada Keliso wagaine keke tamo anatulina imi meIsileli o kai imi keke meIsileli, ada keke anatulina imi togugai yogoyogomi o kai kaliva keke yogoyogomiyavo, kai kaliva o kai vevine. Faina imi matatabumiyavo anafaiweya seya-moena Keliso wagaine.†

²⁹ Ada kai imi Keliso yana kalivayavo, aga imiyavo Ebelaamo yana tubudelideliyavo, ada amivutuvutuga-nai faine tuwai-moena Yaubada givonadabadaba ani imi anatoinavuvuna.†

4

¹ Aku yaku vona ani taidei anafaiweya ananuwanuwa. Kaliva natuna aimo tauna

† 3:26 Iyo 1:12, Lom 8:14-16 † 3:27 Lom 6:3-4 † 3:28 Lom 3:30, 1Kol 12:12-14 † 3:29 Gal 4:1,7, Lom 4:13, 8:17, Efes 3:6

tamana yana ebaveimeya matatabuna gina vaina tova-nai kwamana-nai gina veasekumaga. Aku faina aimo yana tova kwamana ani anaivi anaita anafaiweya togugai yogoyogona.

² Anatoitaveyabina yadi veimeya dibune gina miyamiya ada yana giba-dina ina itaveyabidi ginanau analaba anamalamala gina nuwagana, anafaiweya tamana givenuwadadanena.

³ E ada muliya-yo Keliso gielai, ideyavo anafaiweya biyabiyama, ada babi anaaluwaluwayavo yadi veimeya kamulimuliyedi vaita ide yadi togugai yogoyogodiyavo.

⁴ Aku tova-nai anato va lemoena Yaubada givenuwadadanena giyegemona, Natuna giimili gielai, ada vavine-mowa wagaine gitubuga ada gimiyi Mosese yana veimeya dibune.†

⁵ Taidei anafaiweya giyegemona e ada ide kamiya veimeya-nai dibune ani gina tutuveobuda, ke taidei wagaine ide Yaubada natunavo kana miyamiya.

⁶ Ada imiyavo Yaubada natunavo faina, Natuna Aluwaluwana giimilina ke giluku aseasemiya, ada Aluwaluwana Banae givedovedou Yaubada wagaine, “Kamaku! Kamaku-yo!” †

⁷ Taidei faina, imiyavo keke-mowa aimo togugai yogoyogona anafaiweya, aku imi Yaubada natunavo. Ada imi natunavo faina, kaduwe gavana iwakana gikidewedewena ani wana nuwagana, faina imiyavo toinavuvuna.†

Paulo nuwana givenauna meGaletiya faidiya.

† 4:4 Iyo 1:14, Lom 8:3-4

† 4:6 Lom 8:15-17

† 4:7 Gal 3:29,

Lom 8:17

8 Tova nagona wagaine tova-nai Yaubada keke wada alamane, wavetogugai yogoyogona badiyavo yaubada fwayafwaya wagaidiya.

9 Aku tova malinai Yaubada velemoena waalamanena, o kai gana vonaga Yaubada ani velemoena imi gialamanemi. E ada gavaiyamu-yo wayewayewa-vagila babi anaaluwaluwayavo kabekabebedi ke fanifanidiyavo wana muliyedi? Gavaiyamu, nuwanuwami wana vetogugai yogoyogona kaduwe wagaidiya?

10 Imi keke meIsileli aku meIsileli yadi tafalolo anayadayada lakaidi waitaitaveyabidi, kaduwe vaikoi evaguna adiveimeya ke abutu tulidi tulidi adiveimeya ada malamala evaguna adiveimeya.**

11 E ada gavenuwana lakaina faimiya, aenana yaku faisewa wagaimiya gina vegaitomakavokavovo.

12 Tubuiyakuweyavo, wagaimiya gaveoveola toyogina, imiyavo nagona yavuyavumiyavo Mosese yana veimeya anamuliya wagaine wamiyamiya, ani Iya malinai anafaiweya. Tuwaina keke aimo yogoyogoku veimeyanai wagaine. Ada imi gilubodami yami nuwanuwa wada sevedavedamadi ke yaku dewa wada dewayena. Keke tamo koyona wadagai wagaikuya.

13 Waalamanena nagona gamaduelai gaveoga faina, ada tova-nai wagaine valeya iwakana galumamalena wagaimiya.

** 4:10 Dewa-nai wagaine inuwanuwa vaita yegayegana ina nuwagana Yaubada matane, aku keke.

¹⁴ Ada yaku veoga faina vita gavelemi, aku auwe keke wada voyouyoyeku kadu keke wada vegaitoma-kavokavovoyeku. Aku wadeweku anafaiweya vaita Yaubada yana anelose seyana, o vaita Iya Yeisu Keliso Tauna.

¹⁵ Tova-nai wagaine wavemwamwala lakaina, e aku malinai vemwamwala-nai gadedeku gina? Gavonavona velemoena wagaimiya, tova nagona kai amifaiweya aga, matafoumi wada etomwamwali wada veleku.

¹⁶ E aku malinai ani gavaiyamu, Iya vona vele-moena wagaimiya gaifufuyena faina, malinai waitaitaku vaita amigaviya anafaiweya?

¹⁷ Biyavo-dina faidiya galuluwageyemi ani ibalabalalava e ada yami nuwanuwa toyogina wanasena wagaidiya, aku yadi nuwanuwa vu-vuna keke iwakana. Nuwanuwadi ina ludakami wagaimiya e ada badiyavo gaga wa yami aseawaega nodi wana vemoimoinedi.

¹⁸ Kai gaito seyana nuwanuwana lakaina gaitoma iwakadi gina gugaiyedi faimiya, taidei iwakana. Aku gilubodana anafaiweya tova moy-aina ida gugai, kai Iya nodi kamiyamiya o kai keke.

¹⁹ Natukuweyavo, malinai imi faimiya kaduwe gauloulolo, vaita vevine yadi venatuna anauloulolo anafaiweya ilutovonina. Ada aimo gana uloulolo anafaiweya analaba yami vetumagana ginatabo ginalaka ada Keliso yana dewa gina toyogina yami nuwanuwa wagaine.

²⁰ Iya nuwanuwaku lakaina tova malinai imi nodi kada miyamiya e ada Iya gada ifufu bikana imi nodi. Aku gavaiyamu malinai gana ifufu

wagaimiya? Gavenuwana lakaina imi faimiya.

Veimeya anawai ada vetumagana anawai faidiya ani Ega ada Sela yada ebaita.

²¹ Ada wana voneku. Imi gavega nuwanuwami Mosese yana veimeya dibune wanamiya ani gavaiyamu, maita waalamanena gavana veimeya-nai givona o kai keke?

²² Faina Veimeya anabuki wagaine givona ani Ebelaamo natunavo adiselu. Seyana, Ebelaamo yana togugai yogoyogodi Ega wagaidiya gitubuga.** Aku seyana, banae tauna vavinena Sela badi keke togugai yogoyogodi wagaidiya gitubuga.†

²³ Ada natuna gitubuga badi vavine togugai yogoyogodi wagaidiya ani ideyavo kaliva-mowa yada tubugeya anafaiweya giyegemona.† Aku banae gitubuga badi vavine keke togugai yogoyogodi wagaidiya, ani banae yana tubuga vuvuna Yaubada yana vonadabadaba wagaine.†

²⁴ Ifufu taidei anunu anaifufu. Vevine adiselu ebaita seyana Yaubada yana veyavo anawai iluwei faidiya. Veyavo anawai nagona ani Yaubada Oya Sainai wagaine giyegemonena, tainei yana veimeya anawai. Ada wai-nai taidei

**

4:22 Ebelaamo yana yoo tayuwe yadi dewa taidei anafaiweya. Vavine lakaina kai kakalina ani tamo tova yana togugai vavine gina awaegena moganena wagaine. Taidei wai-nai wagaine vavine-nai kakalina banae yana tubudelideli gina kiveinalina. Togugai-nai natudiyavo ina venatunedi ani keke tauna natunavo aku vavine kakalina natunavo. (Eba 16:1-15) † **4:22** Eba 21:1-7 † **4:23** Lom 9:7-9 † **4:23** Eba 17:16-19, 18:10,14, 21:1-2, Ibel 11:11

ani badiyavo togugai yogoyogodi gikikiveyege-monidi. Ada Ega ebavonaluvefosa wai-nai faine.

²⁵ Vavine-dina Ega ani badi anafaiweya ebavonaluvefosa Oya Sainai gimiyamiya Alebiya anafafali wagaine. Ada kaduwe vavine-dina ebavonaluvefosa tova malinai melala Yelusalema faina. Melala-nai anakalivamomo nodi ivetogugai yogoyogona Mosesese yana veimeya dibune.[†]

²⁶ Aku Sela, badi Ebelaamo vavinena vele-moena ani anafaiweya gabama anaYelusalema getane-deya. Vavine-dina ani keke togugai yogoyogodi, ada badiye ani ide tovetumagana in-ada.^{**}

²⁷ Taidei nuwanuwa-nai Aiseya giifufuyena tova-nai gifalofisai, givonaga,

“Oye vavine kakali, oye keke
uda venavenatuna
ani una vemwamwala.
Oye venatuna anaulolo keke uda lutovoni
ani unakova vemwamwala,
faina o mogane ginuyabuyabuni ani
aimo-yo natumomo moyaidi una nuwagadi.
E ada badi vavine wa moganedi ani
natudiyavo maita moyaidi aku
imi natumiyavo ani aimo moyai-moedi.” [†]

[†] **4:25** Lom 8:15, Ibel 12:18-21

^{**} **4:26** Vona taidei

ananuwanuwa ani taide anafaiweya. Badi gavega keke ida luveyabina Mosesese yana veimeya anamuliya aku ivetumagana Yeisu Keliso wagaine ada Banae gagana yana faisewa wagaine iluveyabina, biyavo-dina ani badi Yelusalema getane natunavo. Yelusalema getane ani tainei melala gabameya. (Ibel 12:22, Ive 3:12, 21:2,10) [†] **4:27** Ais 54:1

Taidei anafaiweya Aiseya givona.

²⁸ Aku tubuiyakuweyavo, imiyavo ani Yaubada natunavo yana vonadabadaba wagaine, anafaiweya Aisake.

²⁹ Aku tova tayuwe wagaine natuna-nai gitubuga kaliva-mowa yada tubugeya, ani gikiveulolonina banae kwamana-nai gitubuga Aluwaluwa Tabuna yana toyogineya. Ada malinai anafaiweya. Badi gavega Mosese yana veimeya anamuliya wagaine iluluveyabina ani badi kivekoyo ifaifaisewana badi gavega Keliso wagaine iluluveyabina wagaidiya.

³⁰ Aku Buki Tabu gavaiyamu givona? Givona,

“Taidei togugai yogoyogodi vavine wa natudi una wavidi inatau.
Faina vavine keke togugai yogoyogodi natudi anakaibe tamana laovina gina vaina, aku keke-mowa vavine togugai yogoyogodi natudi.” †

³¹ E ada tubuiyakuweyavo, ideyavo keke vavine togugai yogoyogona natudiyavo, aku velemono badi inada ani vavine-dina keke togugai yogoyogodi.

5

Keliso gietoyavuda Mosese yana veimeya yana iyogona wagaine.

¹ Keliso gietoyavuda Mosese yana veimeya wagaine-deya,† e ada ideyavo ani keke aimo

† **4:30** Eba 21:10, Iyo 8:35 † **5:1** Iyo 8:32,36

veimeya-nai yana togugai yogoyogodeyavo. Taidei faina gilubodana kana mididi toyogina. Keke taudeyavo kana kivevitada ke kanaseda kaduwe veimeya-nai dibune ginayogo-vagileda.†

² Wana nogalina. Iya Paulo gana vonemi, kai biyavo-dina bonadi wana abina ke wana awaegemi vovomi bubuna bwatana ina tomogoloina, aga Keliso yana awaega faideya ani keke maita gina lememi.

³ Kaduwe gana luvagilena moyaimi wagaimiya. Imi gavega tomogolota anagiduwa wagaine wana awaegemi ke Mosese yana veimeya wana mulimuliyedi, aga gilubodami yana veimeya matatabu-moena wana muliyena.

⁴ Imiyavo gavega wagaluvaluwa ke Mosese yana veimeya anamuliya wagaine yami yegayegana Yaubada matane wana nuwagana ani velemoena taumiyavo waluludakami Keliso wagaine-deya, ada Yaubada yana nuwadoga wavedomobubusena.

⁵ Aku ideyavo ani kavetumagana. Ada Aluwaluwa Tabuna yana lemeya kaveitabod-aboda Yaubada ginaseda yegayegadeyavo Tauna matane.

⁶ Faina ide Yeisu Keliso nodi kaveseyana ani kai vovo anatomogolota kavaina o kai keke, aga keke tamo gavana.† Aku tainei-mowa gait-oma velemoena lakaina ani yada vetumagana-nai giveveguwa, e ada wa yada nuwakabubu nodi kaliva faidiya kanuwanuwa ke kalemelemedi.

⁷ Tova nagona wa yami vetumagana wamadumaduga iwakana Keliso yana wai wagaine. Gaito

† 5:1 Gug 15:10 † 5:6 Kol 3:11

yami nuwanuwa gisibale ke vona velemonoena anamuliya wailova?

⁸ Nuwanuwa tainei wamuliyena ani keke gidaela Banae Yaubada gidouwemi wagaine.

⁹ E ada wana nuwaududuna vaita taide vewala fwayafwaya-nai kaliva toiye-mowa ivevewala ani matatabumi gina vaimi, anafaiweya yada vona seyana givona, “Falawa anayisti ani gaitoma kabisona, aku falawa negenine gina lukunau ke matatabuna gina lutuga.”†

¹⁰ Aku Kauveya gavetumaganena gina lememi e ada keke mali nuwanuwa wana vaivaidi wagaideiya wana mididi. Ada gavakaliva banae yami nuwanuwa gisidakadakana, banae anamatavuloga gina nuwagana.

¹¹ Tubuiyakuweyavo, kaliva tufodi ivona vaita Iya galumamala vovo anatomogolota analauboda kibababala faina. Aku keke. Kai anafaiweya, keke aimo ida kiveulouloloniku. Ada kai gada lumamala anafaiweya, aga yadi agouga Keliso yana alika keloseya faina gida avaina.

¹² Aku nuwanuwaku biyavo-dina nuwanuwa anatosidakadaka ilulumodovemi vovodi anatomogolota faina ani inanau-mowa ada taudiyavo vovodi ina lugoloidi, e ada lulugoloidiyavo!

¹³ Tubuiyakuweyavo, Yaubada keke nuwanuwana aimo wana vetogugai yogoyogona Mosese yana veimeya anamuliya wagaine, aku nuwanuwana yavuyavugimiyavo wana miyamiya.† Taidei miya-nai faine

† 5:9 1Kol 5:6, 15:33, 1bel 12:15 † 5:13 1Pi 2:16, Iyud 4, 1Kol 8:9, 2Pi 2:19

givenuwadadanemi. Aku keke amiiyavuganai wagaine seba wanasei ke vovo ananuwanuwa faina wana gugai-kavokavovo, aku wayami nuwakabubu imi seyana seyana wana velemalema.

¹⁴ Faina Mosese yana veimeya matatabuna giitavana veimeya seya-moena[†] wagaine, tainei, “Kaliva una nuwakabubuyedi o tauni unuwak-abubuyeni anafaiweya.” [†]

¹⁵ Aku kai nuwanuwa koyodi wagaidiya tova moyaina taumiyavo wana veiyovayovaga ke wana veikanikani, wana itaveyabimi aenanai taumiyavo aimo wana luyaweyawelimi.

Aluwaluwa Tabuna yana toyogina wagaine kana miyamiya.

¹⁶ Taidei faina gana vonemi, Aluwaluwa Tabuna bonana wana abiabina[†] e ada keke vovo ananuwanuwa koyodi wana gugaiyedi.

¹⁷ Faina gavana Aluwaluwa Tabuna nuwanuwana ani taudeyavo yada nuwanuwa gaga keke nuwanuwana.[†] Ada gavana taudeyavo yada nuwanuwa gaga nuwanuwana ani Aluwaluwa Tabuna keke nuwanuwana. Taidei adiselu tova moyaina ivenibaina ke ivesitaitaina, e ada gavana nuwanuwami ani keke wana gugaiye.[†]

¹⁸ Aku kai Aluwaluwa Tabuna gina nagonagoyemi,[†] keke Mosese yana veimeya dibune wana miyami ke yawai gina veiveimeye.[†]

[†] **5:14** Mad 7:12, 22:40 [†] **5:14** Vei 19:18, Mad 5:43,44, Luk 10:27, Iyem 2:8 [†] **5:16** Lom 8:3-4, 13:14 [†] **5:17** Lom 7:23, 8:5-7 [†] **5:17** Lom 7:15,18-19 [†] **5:18** Lom 6:14, 8:14 [†] **5:18** Lom 7:4

¹⁹ E ada, dewa koyodi iyegeyegemona tova-nai kaliva taudiyavo yadi nuwanuwa gagana wagaidiya itunutunuvala ani kaalamanedi. Anafaiweya kaliva vovodi iawaawaegge-kavokavovodi, inuwanuwa bwanebwanenena, igadawedawelo,

²⁰ ioduodu yaubada fwayafwaya wagaidiya, ivebalaubalauma, iagoagouga, ivevonavona ke ikikivenuwakoyo, iluluvadiga, inunuwakoyo lakaina, iamaumaula, igavekwavekwageya ke imiyamiyadaka,†

²¹ ada iyuga kwavakwawa, isedasedada, ada mali dewa anafaiweya. Ada kaduwe kaliva yadi giba o kai adiiwi iitaitaluvadigedi e ada iagouga faidiya. Tuwaina gavonemi anafaiweya, malinai gavonevonemi, badiyavo gavega idewadewa anafaiweya ani keke Yaubada yana ehaveimeya ina nuwaga.

²²⁻²³ Aku Aluwaluwa Tabuna guwana kaliva wagaidiya ani taidei anafaiweya.† Kaliva ivenuwanuwakabubu, ivemwamwala, inuwaniwalova, iatuvefaila, inuwakalikali, idewadewa iwakana, idewadewa bikana, ada taudiyavo iawaawatadi. Ada kaduwe tova moyaina idibudibumwaiga e ada wa adivetumagana yadi yauvivila moyaidi wagaidiya.† Taidei dewa-dina faidiya ani keke tamo veimeya gida miyami ayo gida awatadi.

²⁴ Ada badiyavo gavega Yeisu Keliso yana yoo ani bademowa ikivebolagalagana vovo ananuwanuwa koyona ada nuwanuwa luluvadigadi nodi.†

† 5:20 1Kol 11:19 † 5:22-23 Lom 7:4, 8:5, Efes 5:9 † 5:22-23 Mad 7:16-20 † 5:24 Kol 3:5

25 Yawai evaguna ani kamiyamiyanena Aluwaluwa Tabuna wagaine. Tainei faina gilubodana bonana kana abiabina ke Aluwaluwa Tabuna gina nagonagoyeda.

26 Keke kana nuwalaka e ada tubuiyadeyavo kana kivenuwakoyodi, ada keke kana veitaveluveya ke gaito anayegana lakaina kana agouge.†

6

Imi seyana seyana wana velemalesa amivita wagaidiya.

1 Tubuiyakuweyavo, kai gaito wagaimiya dewa koyona gifaifaisewana ada wana itanuwigana, aga imi gavega Aluwaluwa Tabuna ginagonagoyemi ani wanana nuwabikeya wana kivetunutunugina ke wana yewena wai tunutunugina wagaine.† Aku wana itaveyabimi aenanai taumiyavo kaduwe aladibidibi wana nuwigana.

2 Seyana seyana anavita wagaine wana velemalesa,† ada taidei wagaine imi velemalesa Keliso yana veimeya wamatawalewaleya.†

3 Kai unuwana wai ayegana lakaina faina, keke alaiboda kaliva wa anavita unalema, aga ina tauni ufwayanegenegeni. Velemalesa oye kaliva-kavokavovo.

4 Aku kaliva seyana seyana tauna yana gugai gida itavenuvenuwadadanena.† Ada kai yana gugai iwakana, aga gina vemwamwala gavana gigan

† 5:26 Fip 2:3 † 6:1 Sam 141:5, Mad 18:15, 2Kol 2:7, Ibel 12:13, Iyem 5:19 † 6:2 Lom 15:1-2, 1Tes 5:14 † 6:2 Iyo 4:21, Iyo 13:34

† 6:4 2Kol 13:5

faina. Aku keke gina itaveluveye mali kaliva yana gugai wagaine,

⁵ faina gilubodana seyana seyana tauna onana gina waina.†

⁶ Badi gavega Yaubada yana vona anavewala ivaivaina, ani gilubodadi yadi gaitoma iwakadi tufodi ina avetavetala yadi tovewala-dina wagaidiya.†

⁷ Keke uda nuwanuwa vaita oye ani nuwanuwauya ayo Yaubada, e ada afaiweya unasei vaita Banae wa anaawaveleiga. Keke meyameyaganina. Faina gavana kaliva gina bakulina tauna yawaina wagaine, kaduwe anafaiweya guwana gina yalana.

⁸ Kai badi gavega ina bakula vovo ananuwanuwa koyona,† aga guwana ina yalana ani miya luyaweyawela. Aku kai badi gavega ina bakula Aluwaluwa Tabuna yana nuwanuwa anafaiweya, aimo guwana Aluwaluwa Tabuna wagaine-deya ina yalana ani yawai-vagata.†

⁹ Ada keke kana kabekabebe gugai iwakana wagaidiya,† faina kai kana atufefaila-mowa, aimo guwa iwakana kana yalana anatova velemoena wagaine.†

¹⁰ E ada tova-nai seyana gaito kana itana analauboda lema gida nuwagana, aga kana madulemena. Aku velemoena kana gugai iwakana badi tovetumagana gabuyavo wagaidiya.

† 6:5 Lom 14:12 † 6:6 1Kol 9:11,14 † 6:8 Iyob 4:8 † 6:8 Iyo 6:63, Lom 8:13 † 6:9 2Tes 3:13 † 6:9 1Kol 15:18

Paulo yana matawa anaebalauyabu ke veta-lakafoi.

¹¹ Malinai tauku nimakuya vona anaebal-auyabu gana vetokilumina, ada wana itana ani matana lakaina.**

¹² Kaliva-dina iluluyalimi ke vovo anatomogolota wana vaina, taidei anafaiweya igugai e ada vaita meIsileli ina vemwamwala faidiya. Yadi vuvu velemono ana imatauta aenanai kai Keliso anakelose faine ina mididi toyogina, aga uloulolo ina nuwanuwagana badi gavega keke Keliso ida vetumagane wagaidiya.†

¹³ Faina biyavo-dina vovo anatomogolota ivaina nonogana taudiyavo keke Yaubada yana veimeya ida matawalewaleye. Aku nuwanuwadi imi tomogolota wana vaina e ada badi ina gakaikai vaita badi iveimeyemi ada wagugai anafaiweya.

¹⁴ Aku Iyayeku ani keke tamo gavana faina gana gakaikai, aku tainei-mowa yada Kauveya Yeisu Keliso yana alika kelose wagaine faina. Banae yana alika wagaine babi ananuwanuwa vaita gialika wagaikuya, ada Iya anafaiweya vaita gaalika babi ananuwanuwa wagaine.**

¹⁵ Faina kai vovo anatomogolota kavaina o kai keke, aga tainei gaitoma-kavokavovo.

** **6:11** Paulo tubuiyana taidei leta-nai givetokilumina bana faine, aku anaebalauyabu wagaine Paulo feni givaina ada yana vetalakafai givetokilumina e ada toveyawa ina alamanena banae tauna giimilina. † **6:12** Gal 5:11 ** **6:14** 'Babi ananuwanuwa' ani gaitoma moyaina babi wagaidiya ada kaliva taudiyavo yadi kaiwabu ilelelena ke adiyegana ina kilakaina. Gaitoma-dina iveni-baina kelose yana wai wagaine. (Iyem 4:4, 1Iyo 2:15, Gal 2:20-21)

Aku gaitoma lakaina ani Yeisu yawaine katubuga evaguda e ada ideyavo ibuibubuna evagudeyavo.†

¹⁶ Badi gavega wai-nai imulimuliyena ani Yaubada gina veledi nuwaniwalova ke gina nuwakalikaliyedi. Badiyavo meIsileli velemono.

¹⁷ Yaku vona anaebalauyabu aku vona seya-moena. Iya vovokuya bwaya imiyamiya ani ganuwagadi Yeisu anayegana faina.† Taidei faina tova taidei ke gina naunau, keke nuwanuwaku gaito seyana kaduwe vita gina kiveyegemoni wa-gaikuya.

¹⁸ Tubuiyakuweyavo, gaveola yada Kauveya Yeisu Keliso yana nuwadogeya gina lemelememi ke aluwaluwamiya wana lulutovonina. Ika anafai-weya.

Iyayeku Paulo

† 6:15 2Kol 5:17 † 6:17 2Kol 4:7-11

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2